

象  
虫

勺

編

蠶字編卷十八目錄

國朝班爵之始

國朝冠服之制

文武品官冠服

命婦冠服

士民吏役冠服

鹵簿儀仗

大駕鹵簿圖

京職儀衛

直省品官儀衛

命婦儀衛

龜勺編卷十八

嶺南遺書

番禺 凌揚藻 譽釗撰

國朝班爵之始

我朝自

太祖乙卯

明萬曆四十三年

既平諸國每三百人設一

牛象額真五牛象設一甲喇額真五甲喇設一固山額真

每固山左右設兩梅勒額真初設黃紅藍白四旗至是添

設四旗參用其色鑲之共八旗又置理政聽訟大臣五人

扎爾固齊十人佐理

五日一視朝凡有聽斷先經扎爾固齊然後言于五臣五臣言于眾貝勒

然後奏聞

天命五年三月

明泰昌元年

分總兵官品爲三等副將

遊擊亦如之眾牛象額真俱爲防禦官每牛象下設千總

四員天命十一年九月

太宗卽位

改明年爲天聰元年

設八大臣

爲八固山額真

總理一切事務與貝勒坐議出獵行師各領本旗兵行凡事皆聽稽察

又設

十六大臣佐理國政

審斷訟獄不令出兵駐防

又設十六大臣出兵駐

防

以時調遣仍審理詞訟

天聰五年設六部每部以貝勒管理其下

設承政參政啟心郎天聰九年八月設蒙古都統八旗各

一員下設副都統參領各一員

四月上

尊號改明年爲崇德元年

崇德二

年七月更定六部理藩院都察院八衙門官制每衙門設

滿州承政一員以下設左右參政理事副理事主事等官

共五等順治五年九月設六部漢尙書都察院漢都御史

各一員六年四月增設戶部十四司漢主事各一員十年

六月設內三院

秘書宏文國史

漢官大學士各三員十五年七月

諭吏部本朝設內三院有滿漢大學士侍讀學士等官

今斟酌往制除去內三院秘書宏文國史名色大學士改爲殿閣大學士仍俱正五品照舊例兼銜設立翰林院設掌院學士一員正五品其餘學士亦正五品內閣滿字稱爲多里吉衙門翰林院滿字稱爲筆帖黑衙門其侍讀學士以下數員官銜滿名照漢官稱謂通着查例詳議具奏六部滿漢尙書俱作正二品滿字仍稱阿里哈昂邦侍郎俱作正三品滿仍稱阿思哈尼昂邦理事官滿稱一齊蝦喇哈番漢字稱爲郎中俱正五品副理官滿稱愛惜喇庫哈番漢稱員外員從五品額者庫哈番漢字稱爲主事正六品司務添設滿官稱爲他庫喇布勒哈番從九品都察院左都御史滿字稱哈思戶額爾機阿里飛拜察喇昂邦

正二品左副都御史滿稱哈思戶額爾機阿思哈尼拜察  
喇昂邦正三品左僉都御史滿稱哈思戶額爾機阿達飛  
拜察喇昂邦正四品監察御史滿稱察脈拖喇哈番正七  
品經畧改爲司務添設滿員稱他庫喇布勒哈番從九品  
通政使司通政使滿稱阿里飛哈分布勒哈番正三品左  
通政滿稱喀思戶額爾機哈分布勒哈番正四品右通政  
滿稱一齊額爾機哈分布勒哈番正四品左參議滿稱哈  
思戶額爾機愛惜喇庫哈番右參議滿稱一齊額爾機愛  
惜喇庫哈番正五品經畧改爲司務添設滿官稱他庫喇  
布勒哈番從九品大理寺卿滿稱阿里哈分布漢稱卿正  
三品少卿滿稱一爾希哈番正四品寺丞滿稱惜喇脉哈

番正五品寺正滿稱一齋蝦庫正六品寺副稱愛惜喇庫  
從六品評事稱額者庫正七品司務添設滿官稱他庫喇  
布勒哈番從九品這改定官名通行傳諭各衙門啟心郎  
原因諸王貝勒管理部院事務而設令宗人府啟心郎仍  
照舊其餘部院啟心郎俱着裁去其太常寺等衙門官名  
品級著并詳議畫一具奏

國朝冠服之制

大清通禮 皇帝冬朝冠薰貂爲之自十一月朔至上元  
用黑狐上綴朱緯頂三層貫京珠各一皆承以金龍四飾  
東珠如其數上銜大珍珠一夏朝冠織玉草或藤竹絲爲  
之緣石青片金二層上綴朱緯前綴金佛飾東珠十有五

後綴舍林飾東珠七頂如冬朝冠端罩紫貂為之明黃緞  
 裏左右垂帶各二下廣而銳色與裏同十一月朔至上元  
 用黑狐裘服色用石青繡五爪正面金團龍四兩肩前後  
 各一其章左日右月前後萬壽篆文間以五色雲朝服色  
 用明黃惟 南郊 祈穀 雩祭用藍 朝日用紅 夕  
 月用月白其制披領及袖皆石青冬用片金加海龍綠夏  
 用片金綠繡文兩肩前後正龍各一腰帷行龍五衽正龍  
 一襃積前後團龍各九裳正龍二行龍四披領行龍二袖  
 端正龍各一列十二章日月星辰山龍華蟲黼黻在衣宗  
 彝藻火粉米在裳間以五色雲下幅八寶平水十一月朔  
 至上元用緣貂朝服其制披領及裳皆表以紫貂袖端薰



紹繡文兩肩前後正龍各一巵積行龍六列十二章均在  
衣間以五色雲朝珠用東珠一百有八佛頭記念背雲大  
小墜珍寶雜飾各惟其宜惟祀天以青金石爲飾祀  
地珠用蜜珀朝日用珊瑚夕月用綠松石雜飾惟其  
宜條皆明黃色朝帶之制二皆明黃色其一龍文金圓版  
四飾紅寶石或藍寶石及綠松石每具銜東珠五圓珍珠  
二十左右佩帔淺藍及白各一下廣而銳中約縷金圓結  
飾寶如版圓珠各三十佩囊文繡燧觸刀削結佩惟其宜  
條皆明黃色其二龍文金方版四其飾祀天用青金石  
祀地用黃玉朝日用珊瑚夕月用白玉每具銜東  
珠五佩帔及條惟圓丘用純青餘如圓版朝帶之制中

約圓結如版飾銜東珠各四佩囊純石青左觸右削並從  
版色吉服冠頂滿花金座上銜大珍珠一龍袍色用明黃  
領袖皆石青片金緣繡文金龍九列十二章間以五色雲  
領前後正龍各一左右及交襟處行龍各一袖端正龍各  
一下幅八寶立水裾左右開吉服朝珠珍寶隨所御吉服  
帶用明黃色鑲金版四方圓惟便銜以珠玉雜寶惟宜左  
右佩帔純白下直而齊中約金結如版飾餘如朝帶常服  
冠紅絨結頂常服褂色用石青花文隨所御常服袍色及  
花文隨所御裾左右開常服帶如吉服雨冠雨衣雨裳皆  
用明黃色氍及羽緞油綢惟其時 皇后冬朝冠薰貂爲  
之上綴朱緯頂三層貫東珠各一皆承以金鳳飾東珠各

三珍珠各十有七上銜大東珠一朱緯上週綴金鳳七飾  
東珠各九貓睛石各一珍珠各二十有一後金翟一飾貓  
睛石一珍珠十有六翟尾垂珠凡珍珠三百有二五行二  
就每行大珍珠一中間金銜青金石結一飾東珠珍珠各  
六末綴珊瑚冠後護領垂明黃條二末綴寶石青緞爲帶  
夏朝冠青絨爲之餘如冬朝冠金約鏤金雲十有三飾東  
珠各一間以青金石紅片金裏後繫金銜綠松石結貫珠  
下垂凡珍珠三百二十有四五行三就每行大珍珠一中  
間金銜青金石結二每具飾東珠珍珠各八末綴珊瑚耳  
飾左右各三每具金龍銜一等東珠各二朝褂之制三皆  
石青色片金緣其一繡文前後立龍各二下通襲積四層

相間上爲正龍各四下爲萬福萬壽其二繡文前後正龍各一腰帷行龍四中有襃積下幅行龍八其三繡文前後立龍各二中無襃積下幅八寶平水領後皆垂明黃條其飾珠寶惟宜朝袍之制三皆明黃色其一披領及袖皆石青片金加貂綠肩上下襲朝褂處亦加綠繡文金龍九間以五色雲中無襃積下幅八寶平水披領行龍二袖端正龍各一袖相接處行龍各二其二披領及袖皆石青冬用片金加海龍綠夏用片金綠肩上下襲朝褂處亦加綠繡文前後正龍各一兩肩行龍各一腰帷行龍四中有襃積下幅行龍八其三領補片金加海龍綠夏用片金綠中無襃積裾後開餘如貂綠朝袍之制領後垂明黃條飾珠寶

惟宜領約纓金爲之飾東珠十有一間以珊瑚兩端垂明黃條二中各貫以珊瑚末綴綠松石各二朝珠三盤東珠一珊瑚二佛頭記念背雲大小墜珠寶雜飾惟宜條皆明黃色采悅綠色繡文爲五穀豐登佩箴管繫表之屬條皆明黃色冬朝裙片金加海龍緣上用紅織金壽字緞下石青行龍糙緞皆正幅有襃積夏朝裙片金緣緞紗各惟其時吉服冠頂用東珠龍褂之制二皆石青色其一繡文五爪金團龍八兩肩前後正龍各一襟行龍四下幅八寶立水袖端行龍各二其二制亦如之惟下幅及袖端不施章采龍袍之制三色用明黃領袖皆石青其一繡文金龍九間以五色雲福壽文采惟宜下幅八寶立水領前後正龍

各一左右及交襟處行龍各一袖如朝袍裾左右開其二  
繡文五爪金團龍八兩肩前後正龍各一襟行龍四下幅  
八寶立水領袖及裾均如前制其三制亦如之惟下幅不  
施章采吉服朝珠一盤珍寶隨所御條皆明黃色

文武品官冠服

文一品朝冠薰貂爲之十一月朔至上元用青狐頂鏤花  
金座中飾東珠一上銜紅寶石補服色用石青前後繡鶴  
及四爪正蟒朝服藍及石青諸色隨所用其制披領及袖  
皆石青冬用片金加海龍緣夏用片金緣兩肩前後正蟒  
各一腰帷行蟒四中有髮積裳行蟒八緣貂朝服之制披  
領及裳俱表以紫貂袖端薰貂端單貂皮爲之藍緞裏朝

珠珊瑚青金綠松蜜珀隨所用雜飾惟宜條用石青色朝帶用石青或藍鏤金銜玉方版四每具飾紅寶石一佩帔下廣而銳吉服冠頂用珊瑚蟒袍藍及石青諸色隨所用通繡九蟒吉服帶佩帔下直而齊版飾及佩惟宜雨冠雨衣及裳均用紅色坐褥冬狼皮夏用紅褐武一品補服前後繡麒麟餘皆如文一品文二品冬朝冠薰貂爲之十一月朔至上元用貂尾頂鏤花金座中飾小紅寶石一上銜珊瑚補服前後繡錦雞朝帶鏤金圓版每四具飾紅寶石一吉服冠頂鏤花珊瑚雨冠紅色雨衣兩裳青色

惟各省督撫均

得用紅色

坐褥冬用獾皮夏用紅褐緣阜褐餘俱如文一品武

二品補服前後繡獅餘皆如文二品文三品朝冠頂鏤花

金座中飾小紅寶石一上銜藍寶石補服前後繡孔雀朝帶鏤花金圓版四吉服冠頂用藍寶石坐褥冬用貉皮夏用阜褐緣紅褐餘皆如文二品武三品冬朝冠薰貂爲之補服前後繡豹餘皆如文三品惟無緣貂朝服及端罩一等侍衛戴孔雀翎端罩捨猓獾爲之間以貂皮月白緞裏餘皆如武三品兩冠用大紅色雨衣青色文四品冬朝冠薰貂爲之頂鏤花金座中飾小藍寶石一上銜青金石補服前後繡雁朝帶銀銜鏤花金圓版四吉服冠頂用青金石蟒袍通繡八蟒皆四爪兩冠紅色前加緣二寸五分後五寸青色

四品以下在內廷行走及講官兩冠皆紅色

坐褥冬用山羊皮夏用

阜布餘皆如文三品武四品補服前後繡虎餘皆如文四



品二等侍衛戴孔雀翎端罩赤豹皮爲之素紅緞裏朝服  
翦絨綠色用石青通身雲緞前後方欄行蟒各一腰帷行  
蟒四中有襍積領袖俱石青絳緞冬夏皆用之餘皆如武  
四品雨冠 御前侍衛 乾清門侍衛皆用紅色雨衣雨

裳 御前侍衛用紅色其餘侍衛各從其品

四品官以上及御前侍

從官衣服織文均得用蟒文五品朝冠頂鏤花金座中飾小藍寶石一

上銜水晶補服前後繡白鷗朝服片金綠色用石青通身

雲緞前後方欄行蟒各一中有襍積領袖俱石青絳緞冬

夏皆用之朝帶銀銜素金圓版四吉服冠頂用水晶坐褥

冬用青羊皮夏用藍布襯白氈餘皆如文四品武五品補

服前後繡熊餘皆如文五品惟無朝珠三等侍衛戴孔雀

翎端罩黃狐皮爲之月白緞裏朝服翦絨緣如文五品朝

服之制餘皆如武五品文六品朝冠頂鏤花金座中飾小

藍寶石一上銜硨磲補服前後繡鸞鷲朝帶銀銜玳瑁圓

版四吉服冠頂用硨磲坐褥冬用黑羊皮夏用黑棧色布

餘皆如文五品惟無朝珠五品以下惟京堂翰詹科道得用貂裘朝珠六品以下惟禮部

主事司務光祿寺署正署丞典簿太常寺博士典簿國子監丞博士助教學正學錄太常寺讀祝官贊禮郎鴻臚寺

鳴贊壇廟執事武六品補服前後繡彪餘皆如文六

品藍翎侍衛戴藍翎端罩朝服朝珠均如三等侍衛餘皆

如武六品雨冠紅色青緣雨衣青色文七品朝冠頂鏤花

金座中飾小水晶一上銜素金繡服前後繡鸞鷲朝帶素

銀圓版四吉服冠頂用素金蟒袍通繡五蟒皆四爪雨冠

青色前加緣二寸五分後五寸紅色坐褥冬用鹿皮夏用  
灰色布餘皆如文六品武七品補服制如武六品餘皆如  
文七品文八品朝冠鏤花陰文金頂無飾補服前後繡鶴  
鴉朝服色用石青雲緞無蟒領袖皆青倭緞中有襲積冬  
夏皆用之朝帶銀銜明羊角圓版四吉服冠鏤花陰文金  
頂坐褥冬用麕皮夏用土布餘皆如文七品武八品補服  
前後繡犀牛餘皆如文八品文九品朝冠鏤花陽文金頂  
補服前後繡練雀朝帶銀銜烏角圓版四吉服冠鏤花陽  
文金頂坐褥冬用獾皮夏用土布餘皆如文八品武九品  
補服前後繡海馬餘皆如文九品未入流冠服制如文九  
品雨冠青色紅緣雨衣青色凡文武候補候選官頂帶均

與現任同

七品以上得用諸花繪八品九品用雜花及素繪舉人視七品貢監生員視八品

左都

御史左副都御史監察御史直省按察使及各道補服均前後繡獬豸其都察院都事經歷筆帖式及按察使經歷照磨等官俱照本身品級不得用獬豸補服

### 命婦冠服

一品命婦冬朝冠薰貂爲之頂鑲花金座中飾東珠一上銜紅寶石前綴金簪三飾以珠寶護頰條用石青色金約青緞爲之中綴鑲金火燄飾珍珠一左右金龍鳳各一後垂青緞帶二紅片金裹耳飾左右各三每具金雲銜珠各二朝褂色用石青片金緣繡文前行蟒二後行蟒一領後垂石青條雜飾惟宜朝袍藍及石青諸色隨所用披領及

袖皆石青冬用片金加海龍緣夏用片金緣繡文前後正  
蟒各一兩肩行蟒各一襟行蟒四中無襞積披領行蟒二  
袖端正蟒各一袖相接處行蟒各二後垂石青條雜飾惟  
宜領約鑲金爲之飾紅藍小寶石五兩端垂石青條二中  
各貫珊瑚末綴珊瑚各二朝珠三盤珊瑚青金綠松蜜珀  
隨所用雜飾惟宜條用石青色采帨月白色不繡花文冬  
朝裙片金加海龍緣上用紅緞下石青行蟒縹緞皆正幅  
有襞積夏朝裙片金緣緞紗各惟其時吉服冠薰貂爲之  
頂用珊瑚吉服褂色用石青繡花八團蟒袍藍及石青諸  
色隨所用通九蟒皆四爪二品命婦朝冠頂鑲花金座中  
飾紅寶石一上銜珊瑚吉服冠頂鑲花珊瑚餘皆如一品

命婦三品命婦朝冠頂鑲花金座中飾紅寶石一上銜藍寶石吉服冠頂用藍寶石餘皆如二品命婦四品命婦朝冠頂鑲花金座中飾小藍寶石一上銜青金石朝袍片金緣繡又前後行蟒各二中無襕積後垂石青條雜飾惟宜朝裙片金緣上用綠緞下石青行蟒絨緞皆正幅有襕積吉服冠頂用青金石蟒袍通八蟒皆四爪餘皆如三品命婦五品命婦朝冠頂鑲花金座中飾小藍寶石一上銜水晶吉服冠頂用水晶餘皆如四品命婦六品命婦朝冠頂鑲花金座中飾小寶藍石一上銜硨磲吉服冠頂用硨磲餘皆如五品命婦七品命婦朝冠頂鑲花金座中飾小水晶一上銜素金吉服冠頂用素金蟒袍通五蟒皆四爪餘

皆如六品命婦他若品官曾祖父母祖父母父母妻受封者冠服得如所封之品本身加級受封冠服均從本任惟致仕後得照所封之品服用其京外革職畱任之員得照原品頂帶服用其有因公革職未追封誥者祇許服用原官頂帶

### 士民吏役冠服

會試中式貢士朝冠鑲花金頂上銜金三枝九葉狀元金頂上銜水晶授職後各視其品舉人公服冠頂鑲花銀座上銜金雀公服袍青紬爲之藍緣披領如袍飾公服帶制如文八品朝帶吉服冠頂銀座上銜素金貢生吉服冠鑲花金頂餘皆如舉人監生吉服冠素銀頂餘皆如貢生

員公服冠頂鏤花銀座上銜銀雀公服袍藍紬爲之青緣  
披領如袍飾公服帶制如文九品朝帶吉服冠制如監生  
外郎耆老冠頂以錫民人冬夏帽上不得用絨纓大結考  
職吏員在籍止用頂帽不得僭用補服內外各衙門供事  
書吏非年滿考職者不得僭用金頂奴僕優伶皂隸許用  
繭紬毛褐葛布梭布貉皮羊皮其紡絲紬絹緞紗綾羅各  
種細毛及石青色衣俱不得服用冬帽用染騷鼠狐貉獺  
皮不得用貂

鹵簿儀仗

漢官儀天子車駕次第謂之鹵簿兵衛以甲盾居外爲前  
導皆著之簿故曰鹵簿宋延祐後始著爲圖我朝法



駕鹵簿前列導象四民尉二十八人次寶象五民尉八十人雲麾使一人治儀正二人次靜鞭四民尉十四人治儀正一人次前部大樂大銅角四小銅角四金口角四和聲署史十二人次革輅駕馬四民尉三十二人木輅駕馬六民尉三十二人象輅駕馬八民尉三十四人金輅駕象一民尉四十人玉輅駕象一民尉四十四人雲麾使一人治儀正二人次饒歌大樂大銅角八小銅角八金鈺四角二十四龍鼓二十四龍箏十二拍板四仗鼓四金二龍鼓二十四紅纓六署史四十八人民尉百八十八人冠軍使一人整儀尉二人次引仗六御仗六吾仗六立瓜臥瓜各六星鉞各六出警入蹕旗各一民尉六十七人五色金

龍小旗二十民尉四十人雲麾使一人整儀尉二人次翠  
華旗二金鼓旗二門旗八日月旗各一五雲旗五五雷旗  
五八風旗八甘雨旗四民尉七十二人列宿旗二十八五  
星旗五五嶽旗五四瀆旗四神武朱雀青龍白虎旗各一  
民尉九十二人天馬天鹿辟邪犀牛赤熊黃羆白澤角端  
遊麟彩獅振鷺鳴鳶赤烏華蟲黃鵠白雉雲鶴孔雀儀鳳  
翔鸞旗各一民尉四十人次五色龍纛二十次前鋒纛八  
護軍纛八驍騎纛二十四民尉百二十人雲麾使二人治  
儀正二人整儀尉二人次黃麾四儀鎧斃四金節四進善  
納言敷文振武褒功懷遠行慶施惠明刑弼教教孝表節  
旌各二民尉五十六人龍頭旛四豹尾旛四絳引旛四信

扇四羽葆幢四霓幢四紫幢四長壽幢四民尉六十四人雲  
麾使二人治儀正二人整儀尉二人次鸞鳳赤方扇八雉尾  
扇八孔雀扇八單龍赤團扇八單龍黃團扇八雙龍赤團扇  
八雙龍黃團扇八壽字黃扇八民尉百二十八人雲麾使  
一人治儀正二人整儀尉二人次赤素方繖四紫素方繖  
四五色花繖十間以五色九龍繖十民尉八十四人九龍  
黃蓋十紫芝蓋二翠華蓋二九龍曲柄黃蓋四民尉八十  
四人整儀使一人雲麾使一人治儀正二人整儀尉二人  
次戟四親軍八人父四親軍八人豹尾槍二十護軍四十人  
弓矢二十儀刀二十親軍各四十人雲麾使一人治儀正  
二人整儀尉四次仗馬十護軍二十人冠軍使雲麾使

二人次金方几一金交椅一金瓶二金盥盤一金盃一金

合二金鑪二拂二

立夏陳列處暑收

旗尉二十二人雲麾使一人

治儀正二人次九龍曲柄黃華蓋一執蓋武備院掌蓋司

蓋四人前引佩刀大臣十人提鑪二執鑪侍衛二人金輦

在中左右奉輦鑿儀使二人扶輦冠軍使一人雲麾使一

人治儀正二人整儀尉二人旗尉二十八人後扈佩刀大

臣二人豹尾班執槍佩儀刀侍衛各十人佩弓矢侍衛十

人領侍衛內大臣一人侍衛班領二人後管宗人府王公

二人散秩大臣一人前鋒護軍統領一人給事中御史二

人各部郎中員外郎四人侍衛班領一人署侍衛班領一

人侍衛什長二人次黃龍大纛二領侍衛內大臣一人

內大

臣散秩大司燾侍衛什長二人建燾親軍四人佩鳴螺親

軍六人凡職事官均采服親軍護軍旗尉民尉各服其服

皇后儀駕鹵簿大儀輿一乘民尉三十四人儀輿二乘旗

尉十二人黃輿二乘民尉三十四次五色龍鳳旗十旗

尉二十八臥瓜四立瓜四旗尉十二人吾伎四旗尉六人

次黃赤二色龍鳳扇八雉尾扇八旗尉三十二人次赤素

方繖四五色四季花繖四旗尉二十八人五色九鳳繖十

旗尉二十人次金節二旗尉四次拂二

立夏陳列處暑收

香鑪

二金合二盥盤一盂一瓶二金倚一方几一旗尉二十二

人次黃色九鳳曲蓋一旗尉三人鳳輿一乘旗尉八人凡

擎執旗尉民尉各服其服皆內監充

大駕鹵簿圖

休甯汪文端公大駕鹵簿圖記序曰鹵簿之名沿于西漢所稱千乘萬騎屬車九九其護畧鞋綬郵偁容裔之盛槩可想見自時厥後代有損益我朝參用前代舊式視昔特爲簡省制詔有司博考成規丕昭鉅典一器一名必本之于經參之于史驗之物象徵之度數綜往古之豐儀折衷以皇朝之隆軌品章儀具文質得中更定大駕鹵簿爲法駕鹵簿行駕鹵簿爲鑾駕鹵簿行幸儀仗爲騎駕鹵簿合三者爲大駕鹵簿南郊用之命內苑供奉諸臣圖寫裝潢各成巨帙復合繪南郊大駕鹵簿橫卷凡輦輅鑾和旗旛戈戟旌幢麾蓋之設羽儀導從誓御環衛

章服車騎之容莫不臚于緇素傳以丹青承命爲之  
記竊惟蔚宗始志車服江左備圖鹵簿至宋而景德天聖  
屢圖仗衛延祐一圖尙藏秘府然開寶大駕多至萬有  
一千餘人後乃增至二萬餘人過于繁縟則著大觀而示  
尊極誠莫盛于今日矣謹稽首颺言卷端而件繫其名  
物人數如左云

京職儀衛

京官一品杏黃繖一青扇二飾以圓金四用清漢文書銜  
旗槍八金黃棍二二品杏黃繖一青扇二飾以圓金三旗  
槍六金黃棍二二三品杏黃繖一青扇二飾以圓金二旗槍  
六金黃棍二四品杏黃繖一青扇二灑以金旗槍四五品

以下青扇一以上儀衛出京用以導從常日在京一品前引二後從八二品前引二後從六三品前引二後從四四品無前引後從二人五品以下後從一人滿洲官惟親郡王大學士六部尚書乘輿貝勒貝子公都統及二品文臣非年老者不得乘輿其餘文武均乘馬漢官三品以上京堂在京乘四人輿出京昇夫八輿頂用銀幃蓋用阜四品以下文職昇夫二出京四輿頂以錫願乘馬者聽四品以上得繫繁纓凡文武大臣因事入景運門內許帶從官一人

直省品官儀衛

直省文職總督杏黃繖青扇飛虎旗兵拳雁翎刀獸劔金



黃棍桐棍皮槲迴避牌肅靜牌各二旗槍四青旗八巡撫

杏黃緞青扇獸劍金黃棍桐棍皮槲迴避牌肅靜牌旗槍

各二青旗八

二品以上大臣 陛見到京入  
景運門內許帶從官一人

布政司按察

司杏黃緞青扇金黃棍迴避牌肅靜牌各二青旗六各道

杏黃緞青扇各一桐棍皮槲迴避牌肅靜牌各二青旗四

知府同府倅藍緞青扇各一桐棍皮槲各二肅靜牌二青

旗四知州知縣並同縣佐藍緞一桐棍二教職藍緞一雜

職竹版二河道漕運總督視總督學政鹽政織造暨各

欽差官三品以上視巡撫四品以下視兩司督撫與夫八

司道以下教職以上與夫四雜職乘馬餘同京官三品以

上得用引馬 欽差官三品以上與夫八武職三品仍不

得用直省武職提督杏黃繖青扇飛虎旗兵拳雁翎刀獸  
劔刑杖迴避牌肅靜牌各二旗槍四青旗八總兵官杏黃  
繖青扇飛虎旗大刀獸劔迴避牌肅靜牌旗槍各二青旗  
八副將杏黃繖一青扇二金黃棍迴避牌肅靜牌各二青  
旗六參將遊擊都司杏黃繖青扇各一桐棍迴避牌肅靜  
牌各二青旗四守備減牌餘視都司各省駐防將軍視都  
統副都統以下官均與京職同武職均乘馬將軍提督總  
兵官年逾七十不能常乘馬者聽其奏聞請 旨二品以  
上得用引馬

命婦儀衛

一品命婦車輿阜蓋四角綠絲綠幃阜幃輿用銀頂二品

命婦皐蓋不緣飾絲幘皐幘三品命婦皐幘餘視二品四  
品命婦青幘餘視三品輿用錫頂五品以下命婦均青蓋  
餘視四品自二品以上命婦用繪餘均用布凡儀衛皆從  
其夫

蠡勺編卷十八

譚瑩玉生覆校

龜甸編卷十九目錄

禁內侍入班行禮

恩卹前明諸王

平定三藩

伐西藏

破青海

征廓爾喀

平臺灣

西陲撫地之遠

續編卷十九

嶺南遺書

番禺 凌揚藻 譽釗撰

禁內侍入班行禮

順治元年十月戶部給事中郝傑奏言自古刑餘宦寺特供灑掃耳從不敢與朝臣齒明末寵任厥衛遂貽杜勳閹思印邊永清等開門迎賂之禍我國家痛絕中官厥衛錢糧悉歸有司遠近無不歌頌乃者頒 詔大典賜宴廷臣突有內監數輩先行拜舞辱朝廷而羞當世乞 敕下禮部朝賀不許內監入班行禮二年十二月禮部亦言內監仍故明例每遇朝參行禮在文武諸臣之前于禮未合嗣後槩不許朝參亦不必排班從之

恩卹前明諸王

順治三年總督佟養甲提督李成棟入廣州執紹武殺故明藩王十五人于東校場惟滋陽銅陵興化永豐信陽永甯六王避地惠州七年廣州圍急有奉化伯黃應傑者與副使李士璉誘執六王以惠州先降既而悉殺之凡諸王子在襁褓及宗室女已嫁者盡殺焉八年閏二月上諭兵部故明諸王多被誅戮朕甚憫焉今朕親理萬幾務期萬姓得所豈獨故明子姓不在涵育之中今後各直省有故明親王郡王流落地方者該督撫將伊家起送來京分別蓄養其鎮國將軍以下各照原籍編氓一體輸稅當差爾明宗室亦宜悔厥革心仰體朝廷愛惜生全之意於戲

章皇帝仁育一正之心上符湯武而二三連播之臣蒼黃反覆猶欲務翦焉以爲快果何面目以立于寬大之朝乎哉

平定三藩

太宗文皇帝時明登州參將耿仲明隨副將孔有德航海來歸已而廣鹿島副將尙可喜亦降皆遼人仲明則精忠祖可喜則之信父也吳三桂山海衛人明末總兵鎮山海關聞京師陷乞兵于我朝適睿親王多爾袞兵至翁遂降于軍前封平西王三人與有德皆隨大兵入關三桂追流賊入蜀順治六年進封可喜平南王仲明靖南王使定廣東仲明道卒子繼茂襲廣東平與可喜共鎮其地後繼



茂移駐福建卒子精忠襲時定南王有德先戰死于粵西  
故平西平南靖南稱三藩三桂隨大兵定蜀定滇取永明  
王子緬甸平水西安氏功最多進封親王令統所部鎮滇  
黔久乃驕蹇蓄異志精忠亦桀黠不法大爲閩人害惟可  
喜素恭順守藩服 聖祖仁皇帝以三桂可喜宣力有年  
欲令釋兵還朝以全終始適可喜疏請乞骸骨歸遼東乃  
特允其請此康熙十二年三月也三桂精忠不得已亦  
疏請撤兵而實無行意三桂陰勒士馬禁遏郵傳并約結  
部將之在他省者精忠亦與相應和于是十一月三桂遂  
發兵反殺巡撫朱國治自稱天下都招討兵馬大元帥以  
明年爲周元年僞號昭武事聞 詔削三桂官爵命順承

郡王勒爾錦爲甯南靖寇大將軍貝勒察尼副之率師往  
荆州進討又以滇蜀接壤令西安將軍瓦爾喀赴蜀刑部  
尙書莫洛經畧陝西軍事粵西地近貴州則以有德壻孫  
延齡爲將軍鎮之又命前鋒統領碩岱允進據常德以遏  
賊鋒兵未至而賊已逼清浪以小除夕陷沅州十三年正  
月賊至常德常德降澧州長沙俱降四川巡撫羅森提督  
鄭蛟麟總兵譚洪吳之茂亦叛全蜀皆失二月孫延齡又  
反于廣西三月賊兵陷岳州耿精忠亦以是月反時三桂  
蓄力已久天下皆震其威親至常德督戰四方響應雲南  
貴州四川湖南廣西福建相繼失人心皆動搖幸 廟謨  
鎮定先事布置故終獲戡定也先是京師有楊起隆者市

井無賴偽稱朱三太子布其黨李株等糾約滿州各官家  
奴期以十三年元旦入朝時各殺其主卽以主之官官之  
鑲黃旗監生郎廷樞家奴夜醉漏言廷樞急上變遂捕得  
株等二百餘人誅之王大臣并奏誅三桂子孫之官于京  
師者乃戮其子應龍及孫世霖以淨根葉起隆尋亦捕得  
供誅未幾察哈爾又蠢動立命大學士圖海及其未發殲  
之于是諸蒙古帖服無後顧患然穀城懷慶饒州官兵多  
背叛餘于徽州湖口彭澤池州皆有賊竊發 上以賊渠  
三桂也渠滅則諸賊自散趣察尼分兵攻岳州又命貝勒  
尙善爲安遠靖寇大將軍貝子彰泰副之專攻岳其餘以  
貝勒洞鄂與莫洛由陝勦蜀康親王傑書由浙勦閩孫延

齡之叛則命尙可喜及總督金光祖勦禦而以安親王岳樂繼之分遣甫定忽又有王輔臣之變輔臣本姜瓖部校瓖反時殺瓖來降至是從莫洛進甯羌忽反兵攻莫洛戕之遂回平涼據守此皆十三年事也十四年秦州蘭州鞏昌定邊靖邊臨洮慶陽綏德延安相繼失時三桂散偽劄各路煽誘給輔臣軍資數十萬又令賊將王屏藩吳之茂等出蜀肆擾故所在多響應十五年春 上以洞鄂等屯平涼久不克命圖海爲撫遠大將軍往莅師海至督諸將一戰大敗賊于平涼城下輔臣懼率偽巡撫陳彭僞總兵周揚名王好問等降王屏藩等遁自是秦省畧定耿精忠既據全閩又遣賊陷浙之温州黃巖處州及江西之建昌

撫州廣信諸郡廣東潮州總兵劉進忠碣石總兵苗之秀亦與通潮惠並失時杭州將軍賴塔總督李之芳以兵扼衢州賊不得過而陸路有僞都督曾養性僞將軍祖宏勳等連屯二十五營于長石嶺諸處水路則有僞都督朱飛熊張萬恭許英等率水賊萬餘舟三百分泊于小梁山諸處浙東危甚傑書觀望屢奉 詔趣督始進兵既而瑪哈達復處州傅拉塔復黃巖而温州爲會養性踞守迄不下會耿繼祚再入建昌肆焚掠忽棄營去 上知閩中必有海寇入故撤兵自救乃趣傑書賴塔速進兵敗僞將軍馬九玉于衢河西敗僞總兵林福于大溪灘乘勝復江山縣至仙霞關僞將金應虎獻關遂長驅入浦城建陽建甯相

繼下曾養性聞之亦以温州降大兵抵延平精忠大懼先  
遣其子顯祚繳送僞印師至福州率所屬文武出降于是  
閩浙亦定初三桂欲由秦蜀入犯及王輔臣反正圖海等  
守陝無隙可乘乃力保湖南拒守又使僞將軍高大節圍  
吉安以梗入粵之路陰結尙之信授爲招討大將軍之信  
遂反遣人禁其父可喜于私第率藩下人易旗改服擊將  
軍舒恕于省城恕引兵出走副都統莽依圖自肇慶突圍  
出總督金光祖巡撫佟養鉅皆降之韶州南雄相繼陷舒  
恕等走南安南安又陷乃守潁州十六年春吉安賊遁莽  
依圖乃進兵南安原任提督嚴自明以城降賊黨郭義亦  
遁我師遂踰嶺克南雄直至韶州有僞監軍道傅宏烈先

以書來謂大兵速進廣東則廣西一省宏烈可一而當之至是迎于韶尙之信聞大兵入粵先遣其弟之瑛迎降金尤祖亦自肇慶至時可喜已歿命之信仍襲父爵之信招原任高州總兵祖澤清以高雷廉三郡降原任瓊州總兵佟國卿以瓊州降劉進忠苗之秀亦以潮州碣石來歸而廣東粗定耿精忠屬下徐朝弼等首精忠雖歸降仍遣王進功通海寇俟大兵旋日再作亂將降前三日殺范承謨以滅口 上命議政王等按其事皆實以凌遲誅三桂既失援勢漸孤乃以衡州爲僞都自長沙移居之十七年征南將軍穆占復郴州桂陽興甯宜章諸處賊乃盡銳逼承與碩岱等入城死守賊三面攻圍自八月二日至二十日

晝夜不息城壞于礮以竹篋布囊盛土補之且築且戰瀕  
危者屢矣二十一日賊忽拔營去乃三桂已死諸賊皆赴  
衡州故也冬我軍分泊舟師于香爐峽立營于九貴山以  
斷賊長沙衡州路賊困乏食十八年正月遂復岳州由是  
賊始震恐多棄城遁我師由長沙入衡州所向輒克勒爾  
錦等在荊州亦渡江勦賊所過松滋枝江宜都皆下并復  
澧州貝子準達進常德賊已焚廬舍舟楫去蓋三桂孫世  
藩已僭卽僞位于雲南矣上以彰泰爲定遠平寇大將  
軍取雲貴此由湖南入滇之師也傅宏烈莽依圖旣平廣  
西命莽依圖卽由南甯進雲南傅宏烈亦請由慶遠進雲  
南十九年馬承蔭又紿殺宏烈以叛粵地再擾于是命駐



守潮州將軍賴塔帥師守廣東初尙之信雖降仍懷兩端  
趣其援宜章援韶州援梧州皆託故不行三桂死始聽調  
從征廣西至是之信護衛張永祥張士選赴京首其謀叛  
事上命侍郎宜昌阿以巡海爲名赴粵密按其狀部將  
王國棟證之事皆實宜昌阿密檄金光祖執之信于武宣  
之信弟之節等在省城聞變殺國棟欲爲亂賴塔以兵圍  
其第皆就擒之信尋伏誅粵東得不擾會葬依圖歿乃命  
賴塔爲大將軍取雲南此由粵入滇之師也趙良棟偕王  
進寶圖海定蜀良棟復龍安復成都敗胡國柱于建昌遂  
率兵進雲南此由蜀入滇之師也八月彭泰蔡毓榮自沅  
州進十月克鎮遠府偏橋平越龍里以次收復并復貴陽

其餘安順石阡等府相繼下貴州悉定會賴塔自廣西進兵亦屢捷二十年正月朔敗僞將軍何繼祖于石門坎遂復安籠所會僞將軍詹養等率數萬眾陣于黃草壩列鹿角揆牌驅象助戰二月二日我兵自卯戰至晡大敗其眾奪二十二營生擒詹養王有功等獲象馬無算二十一日彭泰賴塔會于曲靖整隊合進屯省城十里外之歸化寺逆酋世璠遣胡國柄劉起龍黃明等率數萬來拒我兵大敗之斬國柄起龍追殺至城下掘長濠困之而趙良棟之師亦自蜀至圍益密先是賊欲分我兵力遣胡國柱夏國相馬寶等分陷建昌敘州永甯馬湖諸處又嗾潭洪彭時亨再叛擾夔巫間至是危急調諸賊回救上預敕諸將

各路追躡令弗得至省城馬寶遁于楚雄眾盡潰與僞將  
軍巴養元偕降 上命械寶至京磔之十月十八彰泰等  
合楚粵蜀諸路兵并力環攻連日夕不息二十八日城內  
勢蹙謀執世璠及郭壯圖以獻世璠聞變自殺壯圖及子  
宗汾亦自殺二十九日僞將軍線絨等開門降遂擒僞大學  
士方光琛等磔之戮世璠屍傳首京師夏國相竄于廣南  
尋亦來降彰泰以其爲三桂壻之京師伏誅胡國柱遁于  
雲龍州度不能脫自縊死其餘僞文武官皆降 上乃盡  
撤滇粵閩藩下兵歸京師贈卹殉節諸臣分別諸將功罪  
黜陟之大赦天下與民休息億萬年丕丕基于此矣又

福王名由松

福王常  
子

甲申國變南中府部等官迎王至南

京以內守備府爲行宮四月四日監國十五日僭卽位稱  
明年爲宏光元年順治二年乙酉五月大兵渡江王奔

蕪湖十五日

大兵追至蕪湖執王北去丙戌五月賜死

唐王名聿鍵

諸王碩嫡孫其父器蓋先  
死王子崇正五年襲王爵

順治乙酉僭卽位

于福州以布政司署爲行宮改元隆武丙戌二月楚撫何  
騰蛟江右楊廷麟皆有疏來迎欲往江右八月乃決計赴

贛二十一日啟行二十四日抵順昌

大兵追及與曾妣

同斬于汀州永明王名由榔

淮王常瀛少子  
初封衡陽王

以順治丙戌

十月十四日稱監國十一月僭卽位改元永曆以肇慶府

署爲行宮庚寅正月王避滇寇奔梧州雷馬吉祥李元允

守肇慶壬辰孫可望遷王於安隆所丙申李定國護王遷

雲南已亥王入緬辛丑緬人執王歸于王師故福王唐

王永明王亦稱三藩

先是唐王聿鍵被執于汀州其弟聿

驍等奉王監國僭位于廣州改元紹武

青浦楊陸榮采南氏嘗採刼灰浮海

等書成三藩紀事本末四卷自序曰闖賊肆逆既及君后

明之子孫臣庶不能討聖朝念萬古君臣之義不可以

不正赫怒興師逆賊西竄勝朝不共之仇藉以復焉真

人出而大難平乾坤之位定矣有明諸藩誠思復仇之大

德痛餘氛之未除憑藉威靈共翦殘孽迨乎罪人斯得

藉土來歸庶幾上順天心下從民願度德量力計無踰此

昔殷辛失德微子抱器歸周夫子刪書不以微子不正位

號爲罪而亟稱之曰仁當是時取殷之天下者周也視

聖朝之取天下于闢而且爲明之子孫臣庶復不共之仇者彼此相衡判若天壤乃微子可以歸周諸藩顧思僭號自立仁者固如是乎秦人失鹿楚人攫之與楚人爭之可也與攫楚之人爭之不可也何也義不可也且向也以全盛之天下授之羣盜今也以破殘之疆土衡抗天朝天旣厭明德尙思挺而走險豈惟違乎仁悖乎義云爾哉抑亦不智甚矣然猶藩之者何也曰不沒其實正所以不予其僭也其實藩也則明之祖宗未嘗以統授之也明之百姓未嘗以統歸之也上不以統授下不以統歸而妄干大號是僭而已矣僭竊之人王法之所不宥然則諸藩之隨起隨滅身膏斧鑕夫亦其自取焉爾若夫擁立諸臣獨

無罪乎夫伊尹五就管仲一匡苟審所優負而爲之君子且不以爲過不然則首陽餓夫不聞仗武庚以倡亂也審此而諸臣之爲功爲罪瞭若指掌矣

### 伐西藏

康熙五十八年西藏達哇藍占巴等叛天子命十四親王爲大將軍噶爾弼爲副將軍率永甯副將岳鍾琪征之鍾琪領兵四千先至察木多獲逃酋探知有準噶爾使者在其地誘各番酋守三巴橋過我兵鍾琪念三巴橋者進藏第一險也賊若斷橋守之我兵勢不得過而其時兩將軍隔數千里無由咨詢乃選能番語者三十人衣番服飛馳至落籠宗禽其使者五人殺六人諸番聞之驚以爲神

相與匍伏降無梗道者已而副將軍率諸將來會將鼓行入藏忽大將軍以調蒙古兵未至檄諸將各就所到處屯兵待之毋輕動鍾琪請于副將軍曰我兵齎兩月糧自察爾多來已四十餘日若再待大軍糧且盡聞西藏部落有公布者爲其右臂最强能檄令先驅當無俟蒙古兵也副將軍許之鍾琪卽招撫公布渡江殺逆番七千人禽首犯達哇等自四月十三日用兵至八月十九日西藏平 聖祖仁皇帝嘉之遷鍾琪四川提督駐松潘

### 破青海

雍正元年青海羅卜藏丹津寇西甯撫遠大將軍陝督年羹堯召四川提督岳鍾琪會謀鍾琪沿途勦撫有潘下等



番爲賊阻道者滅之有哈齊等番爲賊虐者撫降之有果  
密等番盜官馬聚大石山喊鎗者擊殺之自松潘行至西  
甯五千餘里烽烟肅清青海爲之奪氣旣見大將軍卽奉  
檄征爾格弄寺喇嘛于華里羅氏黨也華山甚險其下五  
堡環峙軍到寂然鍾琪曰是有伏也遣騎搜之堡內賊果  
起鍾琪三分其軍奪山殺賊賊敗走追至一山有高樓賊  
伏其中發矢石鍾琪命健兒二十人密攜引火木梯從兩  
旁進而躬率大隊迎戰戰方慶樓上烟起天大風燄光灼  
耀賊累然焦爛墜矣是役也破賊萬餘我兵止三千也  
還營大將軍喜謂鍾琪曰上知公勇將命公領萬七千  
兵直搗青海約四月啟行何如鍾琪曰青海賊無慮十萬

我以萬七千當之宜乘其不備且塞外無畜牧所不可久

屯鍾琪願請精兵五千馬倍之二月即發大將軍以其言

奏世宗壯之加奮威將軍如期出塞行至崇山見野獸

羣奔鍾琪曰此前途有放卡賊也募食速驅果禽百餘人

自此賊探信者斷矣至哈達河賊據河立營鍾琪渡河戰

斬千餘人賊竄而西追之其黨貝勒彭錯等降知羅卜藏

丹津擁眾數萬駐烏蘭大呼兒鍾琪拔營夜行遲明至其

處賊尙臥馬未銜勒聞官軍至驚不知所爲則皆走生禽

賊母阿爾太哈賊妹阿寶等羅卜藏丹津衣番婦衣騎白

駝走噶爾順鍾琪留兵守柴旦木要害處而躬自追之日

行三百里至一地見毯毯然紅柳蔽天目不能望遠夷人

曰此桑駝海也路自此窮矣鍾琪乃班師是役也以五千兵往返兩月降台吉三窩台吉十有五斬賊八萬餘生獲男婦軍器駝馬甲帳無算獻俘京師 世宗告廟御太和殿受賀以青海平大赦天下加鍾琪公爵仍命率師二萬征莊浪衛諸番皆青海餘孽也所至虜服乃安插洛力達等十六族耕地起科而奏改莊浪爲定番縣

### 征廓爾喀

廓爾喀烏斯藏以西一大部也烏斯藏卽古佛國今分爲前後兩藏自蜀省打箭爐西行七十二驛至前藏又十二驛至後藏又十二驛至濟隴又三十驛至石宿橋爲後藏極邊地過橋以西則廓爾喀矣前藏有活佛號曰達賴喇

嘛相傳如來後身世世轉輪爲之每將死則自言往生處其大弟子如言物色之得嬰兒卽奉以歸謂前喇嘛所托生也其真僞不可知而準噶爾喀爾喀及各蒙古萬餘里夷人皆尊信之爲佛教大宗後藏亦有活佛號曰班禪其名位視達賴喇嘛稍次而諸夷亦崇奉惟謹此二藏本不隸中國元世祖時有八思巴尊爲帝師明成祖時有哈立麻册爲大寶法王皆未嘗待以屬禮也入我朝始內附爲我外藩康熙末爲準噶爾所竊據以大兵克復之先嘗有藏王主國事乾隆十五年藏王朱爾墨特那木扎爾謀不軌爲我駐藏大臣傅清拉布敦所誅遂不復立王以國事統歸達賴喇嘛及班禪管理于是以教主兼國王事尤

倚 天朝以爲重有丹津班珠爾者本班禪部下頭人以

罪被黜竄入廊爾喀結其酋喇特納巴都爾突入後藏拆

殿上金瓦及掠寶器而去

兩藏教主所居皆鑄金爲殿瓦凡寶座梁柱欄檻悉嵌珠玉寶

石不啻華嚴樓閣七寶裝成者

乾隆五十三年事也班禪及達賴喇嘛飛

章馳奏

上以地遠不欲用兵將遣人諭解之而賊又盤

踞聶拉木絨轄擦木瑪噶轄爾甲等處肆擾告急之奏狎

至乃 命嘉勇公福康安爲大將軍超勇公海蘭察川督

惠齡爲參贊大臣調集滿漢官兵及蜀省屯土番兵備征

勦其饋餉則命大學士川督孫士毅主藏東路駐藏大臣

和琳主藏西路濟隴以外則惠齡主之五十七年將軍等

由青海至後藏以四月乙未出師先遣領隊大臣成德岱

森保由聶拉木進總兵諸神保駐紮防其剽襲後路福海二公與賊戰于擦木戰于瑪噶轄爾甲直抵濟隴成德亦由聶拉木轉戰而入凡賊所佔後藏城悉復六月庚子遂入賊境賊舉國來拒于噶多普福公分前隊爲三令海蘭察統之又分前隊爲二公自統之遣護軍統領台斐英阿在木古拉山與賊相持福公卽從問道衝賊營海公又繞山出賊營之上與福公合勢共克木城石卡數十追奔至雍雅俘其頭人成德亦克鐵索橋進至利底福公又檄諸神保亦至利底以壯聲威于是舉國洵懼遣人來乞降福公曰是緩我兵也弗可聽嚴檄斥之七月庚子裹糧再進厯噶勒拉堆補木特帕朗古橋甲爾古拉集木集等處

七百餘里凡六戰皆捷所殺四千餘人喇特納巴都爾益  
震懾遣人再乞降先歸丹津班珠爾之屍以其首旤也獻  
還所掠金瓦寶器等物令大頭人噶莫第馬達特塔巴等  
齎表恭進馴象番馬及樂工一部其餘方物不可數計  
高宗鑒其誠乃許受降八月丁亥奉詔班師是役也用兵  
在二萬餘里之外成功于一年之間將厲死綏士懷挾纘  
良由 聖天子睿謨廣運洞燭事機轉餉調兵信賞必罰  
用能成此大勲也猗與盛哉

平臺灣

臺灣自古不隸中國文獻通考云泉州之東有島曰澎湖  
旁有毘舍耶國蓋卽是也明嘉靖中海賊林道乾爲俞大

猷所逐遁入臺灣以地皆土番不樂居遂殺番取血固舟  
人占城天啟中奸民顏思齊引日本倭據之鄭芝龍附焉  
崇正元年芝龍就撫以其地僑荷蘭紅毛夷我朝順治  
初大兵下閩芝龍降其子成功不從據金門廈門諸島屢  
爲患十六年自江南敗歸十八年夏遂取臺灣名東都設  
天興萬年二縣康熙元年成功死子錦襲改東都爲東甯  
改縣爲州南北路及澎湖增安撫司三其地肥饒穀歲三  
熟閩粵人爭趨之二十年錦卒子克塽襲僞將劉國軒鎮  
澎湖二十二年我靖海將軍施琅克澎湖克塽國軒降乃  
設臺灣府及臺灣鳳山諸羅三縣其地東倚山西傍海北  
至雞籠城南至下淡水長千餘里東西闊四五十里或十



餘里東則層巒疊嶺生番所居不隸版籍也六十年奸民  
朱一貴倡亂總兵歐陽凱戰死府城及諸羅鳳山俱失一  
貴稱義王僭號永和閩督滿保遣提督施世驃總兵藍廷  
珍以萬七千兵平之俘一貴獻闕下雍正元年以諸羅北  
境遼闊增設彰化縣及北淡水同知六十餘年俗日淫侈  
官斯土者又日事腹削會漳泉二府人之僑居者各分氣  
類械鬪至數萬人吏不能止至水師提督海澄公黃仕簡  
率兵至乃解散自是民狃于爲亂豎旗結盟公行無忌淡  
水同知潘凱爲城外無名屍誑往驗甫出城卽被殺并胥  
役殲焉當事者不能得主名則詭以生番報因以酒肉誘  
番醉而掩殺之奏罪人已伏法而殺人者實脫然事外民

由是益輕官吏而番亦銜恨刺骨乾隆五十一年彰化縣

民林爽文恃所居大理牴地險族繁久恣爲盜賊囊橐而

閩廣閩故有所謂天地會者奸徒結黨名目爽文借以糾眾嘯聚

將起事太守孫景燧至彰化趣縣令俞峻及副將赫生額

遊擊耿世文率兵役往捕不敢入駐營于五里外之大整

諭村民禽獻否則村且燬先焚數小村怵之被焚者實無

辜也爽文遂因民之怨集眾夜攻營全軍盡沒赫耿俞皆

死焉時十一月二十七日也明日賊乘勢陷彰化孫守及

都司王宗武同知長庚前同知劉亨基典史馮啟宗悉爲

所殺十二月六日又陷諸羅縣令董啟埏死之淡水同知

程峻亦爲羣賊所害鳳山縣有莊大田者亦盜魁乘亂起

十三日陷縣城縣令湯大奎自刎死惟府城有總兵柴大

紀及監司永福同知楊廷理等率兵民固守城屢攻不能

夾文本漳人當械門之後恐泉人不

破而彰化之鹿港賊已遣僞官來監稅

同亂乃邀泉人劉志賢共起事欲使爲泉人借志賢自署理番同知至鹿港收貨稅有泉民林湊等

起義禽之是以府城鹿港兩海口俱未失閩中間變黃仕

簡率兵由廈門渡海入府城陸路提督任承恩率兵由蚶

江渡海入鹿港副將徐鼎士由閩安渡海入北淡水俱以

五十二年正月初旬至賊勢稍斂黃仕簡命大紀北取諸

羅總兵郝壯猷南取鳳山大紀連戰復諸羅遂守之壯猷

南出二十里爲賊所阻任承恩之至鹿港也距大理杙賊

巢僅四十里亦以兵少不敢進壯猷頓兵幾五十日以二

月二十一日始進鳳山鳳山空無人招民復業賊卽潛入其中與外賊相應三月十日城復陷遊擊鄭嵩死焉壯猷等遁歸府城先是二月中上見兩提督彼此觀望恐不能殄賊有旨令閩督常青爲將軍往督師至是適至府城人心稍固閩督李侍堯甫蒞任卽預約廣督孫士毅調兵四千備緩急而鳳山再陷之信至卽趣兵往遂以三月末悉抵臺賊方攻城急賴以不陷李侍堯又奏調浙兵三千上益以駐防滿兵一千令將軍恆瑞爲參贊赴府城提督藍元枚亦爲參贊分浙兵三千以赴鹿港有旨以失律誅郝壯猷於是人心咸奮時賊雖猖獗勢力未大各村民俱未爲所脅也而諸將以五月二十四日出師慮兵

少不敵甫交綏卽退常青又請兵一萬賊得以其暇蠶食

各村不從者輒殺於是遍地皆從賊

惟鳳山縣南有粵民數十村結寨自守賊

終不敢犯

莊大田驅以擾府城林爽文驅以擾諸羅勢益熾官

兵從鄰省調至又守風兩三月則我兵僅增萬而賊已增十餘萬矣諸羅爲南北之中爽文必欲陷之六月中連日夕攻不止大紀與兵民共守常青先後遣總兵魏大斌參將張萬魁遊擊田藍玉副將蔡攀龍貴林等三度往援皆爲賊所截張魏田蔡僅得入城損兵大半矣貴林及遊擊楊起鄰都司杭富等皆戕于賊諸羅之圍益密入者不能再出大紀告急之文用小字寸紙募人間道夜行始得達賊又禁粒米不得入城攻益急凡百餘戰幸不大餓然饑

疲不能支時藍元枚已歿常青催恆瑞自府城總兵普吉保自鹿港兩路赴援各兵五六千俱以賊盛不得進上念諸羅被圍久特改名嘉義以旌士民而預于六月中調陝督福康安爲將軍及內大臣海蘭察統兵并發聲言十萬冬十月所調蜀番及粵西兵五十先至有旨當往鹿港進會颶風守于崇武澳二十八日忽順風一晝夜數百艘盡抵鹿港海口檣竿如櫛列數里賊謂真十萬至始懼十一月八日福將軍等起行賊方列拒于崙仔頂海蘭察率巴圖魯侍衛發矢殪十餘賊賊卽披靡海蘭察笑曰此一羣犬耳遂麾兵入沿路擊殺賊之伺隙者至牛稠山再敗之卽以是日抵嘉義城官民出迎饑羸無人色見將軍

至無不泣下喜其來而悲其晚也有山名小半天者四面  
陡絕賊遁聚於此十八日百道仰攻又克之賊遂遁歸大  
理杙已築土城頗堅整二十四日官兵至賊猶數萬出拒  
退而復集者數次既夕我兵伏溝坎間賊萬炬來索戰我  
兵在暗中賊不能見而我兵視賊則厯厯可數發槍箭無  
不中賊知失計遽滅火復擊鼓來攻我兵又從鼓聲處擊  
之殺賊無算黎明遂克其城林爽文已攜孥走據守集集  
埔其地前臨大溪溪上就高岸壘石爲陡牆數里其所預  
營扼險處也十二月五日官兵騰而上殺千餘人賊黨皆  
潰林爽文先匿其孥于番社與死黨數十人竄窮谷叢箐  
中十三日先獲其孥五十三年正月四日爽文潛出覓食

遂禽之莊大田之在南也雖與爽文同逆而各自號召不相下乘官兵未南下益焚掠聚糧爲旅拒計已又思出降計未定而將軍已于十六日至牛庄大田倉猝出拒敗而走官軍連蹙之于大武壠大目峯南潭中洲大小岡山水底寮累戰皆捷極南有地名郎嶠者負山臨海最遼阻大田力不支與其黨潛匿焉將軍先遣水師由海道繞而截于水自以大兵環山圍之賊衝突不得出陣殺者數千溺海者數千禽而戮者千餘大田亦就獲臺灣平

### 西陲拓地之遠

西陲準噶爾諸番自策妄阿拉布坦漸強繼以噶爾丹策零世濟其惡我西北兩路常駐重兵備堵勦

如康熙五十六年以內大



臣傅爾丹爲振武將軍駐阿爾台尙書富甯安爲靖逆將軍駐巴里坤散秩大臣祁里德爲協理將軍在西路策應之類

追額爾德尼招之捷

雍正十年噶爾丹策零爲額駙策凌所追至額爾德尼招限大水我

兵乘勢蹙之殺賊萬餘人尸滿山谷河水數十里皆赤

敵始乞和

高宗皇帝御極

之初旋與之定邊界通市易乃寢兵不用

乾隆四年定議厄魯特游牧不

得過阿爾台喀爾喀游牧不得過扎卜堪兩國各遵守已又許其通市易乃盡撤西北兩路兵然聘使往來仍用鈞禮猶未得爲臣服之也至乾隆二十三年靖回

部并戡定準夷則不惟臣服之且盡掃除之蓋天欲就其

地別開一中華世界高宗先天不違後天奉若見事機

可乘遂舉全力以應之既偃甲息戈而卽疆以周索計屯

田起巴里坤外由木壘而烏魯木齊而伊犁以次墾闢屯

田兵不下萬人移安西提督于烏魯木齊統轄之伊犁築

大城設將軍總理準噶爾地及回部事又選滿州兵三千  
挈家往駐室處而兼游牧之長地沃衍種輒倍收自官兵  
屯田外餘地聽人自占內地之民爭趨之村落連屬煙火  
相望巷陌間羊馬成羣皮角氈褐之所出商賈輻輳甚至  
紹興之酒崑腔之戲莫不全至地大物博設道府州縣官  
理訟獄均賦役一如內地較漢之戍已校尉唐之四鎮北  
庭不啻倍蓰過之蓋自有天地以來漠南北地未有如今  
日者也其回部卽漢西域三十六國及唐回紇之地前代  
祇通貢使今亦設官定賦疎節闕目順其俗而撫治之設  
爐于葉爾羌鑄乾隆通寶錢以便民用和闐之玉歲貢天  
府其地向無豚豕今商販流通市有肥瓠他可類推也統

計自伊犁至回部幅員幾及二萬里非我高宗皇帝智  
勇天錫烏能廓清蕩定以拓此一統無外之模如是哉

參与編卷十九

譚瑩玉生覆校